

ARRÜNA ÑACONOMOSORRTI

SANTIAGO

1 ¹ Arrüñü Santiago imostorrti Tuparrü y arrti Jesucristo. Nirraquionco tanu ümo bama israelitarrü icocoromati Jesús, arrübama aboma au nanaiñantai auna icu na cürri.

Torrio mapanauncubu uiti Tuparrü

² Bueno, bama masaruquítaiqui, suraboira ausucarü arrüna sane: Arrtü abe macocotoca aume, aupucünu. ³ Itopiqui arrtü apasamuca tairri ñoma macocotoca, uirri tusio que apapanaunca. ⁴ Apisamuse nurria, tapü ensoro arrümanu napapanauncu, nauqui urria nausüboriqui aübuti Tuparrü, tacana bama tücoboï nacarrüma aübu nurarrti.

⁵ Arrtü anati naqui abarrüpecu chipiacatipü nurria, tari ñanquirati ñapanauncubuti pünanaquiti Tuparrü. Uiti torriatai oemo. Chicuansomoconotipü oñü, arrtü manquiquia pünanaquiti. ⁶ Pero arrti naqui manquioti, tari ñanquirati nurria, tari oncotitü nurria ümoti Tuparrü, tapü ane quiatarrü ñapensacarrti. Arrti naqui choncotitü nurria ümoti Tuparrü, ñapensacarrti tacana arrone turrü au mar. Arrtü maquiütica, peoro isuqui au nanaiñantai. ⁷ Arrti naqui sane ñapensacarrti, champü torrio ümoti uiti Tuparrü. ⁸ Itopiqui abe torrü naca nisüboriquirrti. Primero icocorotiti Tuparrü, y champü tatito.

⁹ Arrtü anati naqui usaruqui champü isane ümoti, tari pucünunati, itopiqui tusio ümoti, ta cuasürüti ümoti Tuparrü. ¹⁰ Arrti rricurrü, tari chimiancanatiyü esati Tuparrü, itopiqui arrübama rricurrü ta tacana arrone nipüsi borrrü, arrüba chübururaupü. ¹¹ Arrtü cuatü surrü omonü, bosübo uirri. Bupususara acü nipüsirri. Ensoro arrümanu coñorrtai niyopüsirri tücañe. Sane ito bama rricurrü, contoatai ensoro ñana pünanaquimia nenarrirrimia.

Macocotoca oemo

¹² Arrtü masamuca tairri ñome macocotoca, urria nusaca. Itopiqui arrti Tuparrü macumananati ñana osüboriquibo, arrüna champü nitacürurrü. Itopiqui turapoiti tücañe sane: “Rracumanaca isuboriqiboma bama isuasürüca ümoma”. ¹³ Arrtü

cuatü oemo macocotorrü na uisamune ba chomirriampü, tapü mapensaca que ta cuatü uiti Tuparrü manu macocotorrü. Chüpuerurrüpi aïñanai macocotorrü ümoti Tuparrü, ni arrtipü achetipü macocotoca oemo. ¹⁴Macocotoca cuantio oemo ui nurrianca uisamune nomünantü. ¹⁵Arrtü oecatü isiu numapensaca churriampü, ane nomünantü osoi. Arrtü títarucapae nomünantü osoi, oconca ñana uirri.

¹⁶Masaruquитайqui, amonsoi nurria arrüna nirranunecaca aume. ¹⁷Nanaiña arrüba omirria macumanataca cuantio oemo uiti Tuparrü, naqui uiche aisamunenti nostoñeca, surrü y panrrü ümo basarurrü auna icu na cürrü. Arrüba nanentaca puerurrü campiabo nubacarrü, pero arrti Tuparrü champü nitacüru nisüboriquirrti, chücampiabopü nacarrti. ¹⁸Chauqui tisamunuti oñü nuevurrü tato nosüboriqui, itopiqui tuicocota arrüna ñemanauncurratöe nurarrti. Rranrrti nauqui aütorrti oñü tacana yarusürürü oñü pünanaqui nanaiña arrüba omirriante uiti.

Arrüna ñemanauncurratöe nubaserebiqui ümoti Tuparrü

¹⁹Bueno bama masaruquитайqui, amonsoi nurria nurarrti quiatarrü. Tapü apanitacatai. Apapensasio nurria, arrtü aurrianca apanita. Tapü contoatai autüboriquia. ²⁰Itopiqui arrti naqui tüboricoti, chisamutentipü arrüna urria ümoti Tuparrü. ²¹Apiñoco arrüba caümainqui churriampü nausüboriqui. Apichimiancasaño esati Tuparrü. Apasusiu nurarrti Tuparrü au nabausasü arrüna amoncoi. Tone arrüna uiche autaesübu eanaqui nomünantü.

²²Sane nauquiche bama masaruquитайqui, apisamuse yacüpucurrü Tuparrü. Arrti naqui oncoitiatái nurarrti, pero chisamutentipü, encañaoti ümotiatöe. ²³Arrti naqui ñoñünrrü oncoiti nurarrti Tuparrü, pero chisamutentipü isiu, anati tacana naqui asaratitü ümo nisurrti au nirrpecurü. ²⁴Asaratitü baeta ümo nisurrti, pero contocaü süroti tato, chaquionotiyüpi causane naca nisurrti. ²⁵Pero ane arrüna nüriacarrü uiche utaesübu eanaqui nomünantü. Mapensariura nurria ümo manu nüriacarrü. Tapü oñonsapecatai manu yacüpucu manu nüriacarrü; uicocora ito. Tapü tacürusu numaquionco. Auqui caüma icunusüancanati oñü Tuparrü au nanaiña nubachücoi.

²⁶Arrtü anati naqui nanti: “Yaserebiquia ümoti Tuparrü”, pero chomirriampü nurarrti, chipiacatipü aitochenacati nurarrti chomirriampü, tonenti naqui encañaoti ümotiatöe. Chübaserebiotipü ümoti Tuparrü. ²⁷¿Causane osoi, nauqui baserebi ümoti Tuparrü? Baserebiquia ümoti, arrtü bayuraca ümo bama bacharrüma y ñome ba biuraca, y chuisamutempü arrüba nomünantü, arrüna isamutema bama macrirrtianuca auna icu na cürrü. Sane urria nubaserebiqui ümoti Tuparrü, champü causane.



(Stg. 1.27)

Tapü cuasürüti oemo taman pünanaquiti quiatarrü

2 ¹Bueno bama masaruquитай, arrtü apicococati Señor Jesucristo, tapü cuasürüti aume taman ñoñünrrü pünanaquiti quiatarrü. Itopiqui arrti Jesús naqui yarusürürrü yüriaburrü asaratitü oemo. ²Supiarrrü cuamatü torrü mañoñünca auna cauta apiyoberabacaño. Arrti maniqui taman coñortai naibirrti, abe sorotiquiaca oro apü nehesti. Tapü arrti maniqui quiatarrü rrürüpütüisati. ³Auqui arraño amasacatü nurria ümoti maniqui coñortai naibirrti. Amucanaño ümoti sane: “Atümo auna coñortai siyarrü ümo nisurratöe”. Tapü ümoti maniqui pobrerü amucanaño sane: “Atüisai taha toripiaciapae, o ariacu atümo aciatai esa niyesa siyarrü”. ⁴Arrtü arraño apisamute sane, chauqui tapuncati maniqui taman pünanaquiti maniqui quiatarrü, chauqui tapiñata isiu napapensaca churriampi.

⁵Aensa te masaruquитай, amonsoi nurria nisura: Arrübama pobrerü auna icu na cürü tonema bama tacümanauncunuma uiti Tuparrü, nauqui acuasürüma ümoti, itopiqui icocoromati. Tonema ñana bama üriabucama ichepeti. Ta sane nurarrrti tücañe: Arrübama isuasürücü ümoma, tonema bama yüriaburrüma ñana tacana nisüriaca. ⁶Tapü arraño apicünsomococati maniqui pobrerü. Abu tusio aume que arrübama rricurrü tonema bama

itachemacaname año. Itononoma año esa bama mayüriabuca, nauqui apapaca uimia. ⁷Y churriampü nurarrüma icütüpüti Jesús, naqui cuasürüti aume.

⁸Urria arrtü apicocota manu yarusürürrü bacüpucurrü sane: “Tari cuasürüti aemo naqui asüborisapa tacana nacuasürüci aemoantoe”. ⁹Pero ane nomünantü aboi, arrtü manrrü cuasürüti taman pünanaquiti quiatarrü. Chauqui tane napipüinate aübu nüriacarrü Tuparrü. ¹⁰Arrti naqui icocotati nanaiña nüriacarrü Tuparrü cunauntaña taman bacüpucurrü chücoconopü uiti, chauqui tane nipünatenti aübu nanaiña nüriacarrü Tuparrü. ¹¹Tamanti Tuparrü nanti: “Tapü aecatü isiu quiatarrü paürrü”. Tonentito naqui nantito: “Tapü atabaiquia”. Sane caüma arrtü chaecapütü isiu quiatarrü paürrü, pero atabaiquia, chauqui tane naipüinate aübu nanaiña nüriacarrü. ¹²Pero ane arrüna quiatarrü nüriacarrü uiche utaesübuca eanaqui nomünantü. Arrti Tuparrü bacurrtarati ñana usaübu isiu arrüna nüriacarrü. Apaquiionsaño arrüna nisurapoi ausucarü, arrtü apapariquia y arrtü ane napachücoi. ¹³Itopiqui ñana au manu nanenese nesa bacurrtacarrü arrti Tuparrü chüpücürusutipü itacuti naqui chirranrrtipü apucüruti itacuti nisüborisapatarrü. Pero arrtü upucüruca itacuti osüborisapa, arrtito Tuparrü pücürusuti utacu.

Uisamunena urria, arrtü uicococati Tuparrü

¹⁴Bueno bama masaruquitaquí, champü yaserebiquirri, arrtü usucana oñü: “Icococati Tuparrü”, pero churriampü nosüboriqui. Arrtü sane osoi, chümorrimiacanapü tato uiti Tuparrü nomünantü osoi. ¹⁵Supiarrtü apicuñucati taman ñoñünrrü naqui icocorotiti Jesús. Arrti champü naibirrti, champü tuburiboti. ¹⁶Arraño caüma amucanaño ümoti: “Taiquiana urria namen tanu, acüburri nurria, aha nurria”, pero chapachecapü ümoti arrüna nirrantiümoti. Arrtü sane aboi, champü napaserebiqui. ¹⁷Sane ito osoi, arrtü uicococati Tuparrü, pero chuisamutempü arrüna urria uirri, champü niyaserebiquirri manu numacoconauncu ümoti Tuparrü.

¹⁸Supiarrtü tamanti ñoñünrrü nanti ümoti naqui icocorotiti Tuparrü: “Bueno, arrti taman icocorotiti Tuparrü, y arrti quiatarrü isamutenti nomirria”. Pero iñumuta sane: “¿Causane ucanü que aicococati Tuparrü, arrtü chasamucapü nomirria? Arrüñü isamute nomirria na atusi que ta icococati Tuparrü”. ¹⁹Arrücü ucanü que aicocota arrtü anati tamantiatai Tuparrü. Urria arrtü aicocota sane, pero hasta bama machoboreca tusio ito ümoma ta anati tamantiatai Tuparrü y tarucu nirrucurrüma ñünanati.

²⁰Sonsorrücü. ¿Taqui chütusiopü aemo que ta champü yaserebiquirri arrtü ucanü aicococati Tuparrü, pero chasamucapü nomirria? ²¹Arrtito Abraham tücañe urria nacarrü au narrtarrü Tuparrü ui manu nauquiche itorrimianatiti aütorrti, nürirrti Isaac, na aconti tacana macumanatarrü ümoti Tuparrü. ²²Ui arrüna isamutenti sane isiu yacüpucurrü Tuparrü, tütusio nurria ñacoconauncurrti ümoti. ²³Itopiqui nantü sane icu Nicororrü: “Arrti Abraham icocorotiti Tuparrü y oncotitü ümoti. Sane nauquiche urria

nacarrti au narrtarrti Tuparrü”. Nantito Tuparrü: “Cuasürüti Abraham iñemo, amigorrti iñemo”. ²⁴Así que barrtai que arrti Tuparrü yasuriuruti oñü, arrtü uisamute nomirria, champürrtü ui arrüna usucana oñü que uicococati.

²⁵Isiu pasabo ui manu paürrü tücañe bavivico aübu sürümanama mañoñünca, nürirri Rahab. Arrti Tuparrü yasutiutito manu paürrü, itopiqui arrümanu ñanecacarrü ümo manuma torrü mañoñünca israelitarü cuamatü arrüpiama ümo manu peblurrü. Auqui bayurara ümoma na aesübuma auqui quiatarrü cutubiurrü, tapü coiñoma ui manuma pohoso au manu pueblurrü. ²⁶Suraboira arrüna machepecatarrü: Arrtü chumanasacapü y arrtü champü nuyausüpü, toconca. Isiu ito arrtü usurapoiatai que uicocoroti Tuparrü, pero chuisamutempü nomirria, usaca tacana oconca au narrtarrti Tuparrü.

Numanitaca

3 ¹Bueno bama masaruquitaquí, tapü aboma sürümanama abarrüpecuqui bama rranrrüma anunecama. Itopiqui arrti Tuparrü manrrü tarucu yacurrtacarrti aübu bama manunecana.

²Contocaü manitate ba chomirriampü. Arrti naqui ipiacati aitochenacati nurarrti chomirriampü, tonenti naqui ipiacatito aitochenacati nanaiña nicütüpürrti, nauqui tapü isamutenti ba nomünantü, urriantai nacarrti. ³Suraboira arrüba torrü machepecatata apü nuñutu: Uiñata prenurrü au naru cavayurrü, nauqui aichübü oemo. Panaca sürümanarrü nicütüpürrti, pero sürotü osoi auna cauta urrianca oerotü aübu ui manu prenurrü chimiamantai. ⁴Sane ito manio barcoca posürümanaca, arrümanio omenotü isu turrü. Arrtü maquiütica fuerte cütüpü peoro. Pero arrtü icüonocotati manu peasomantai taurama ane cütüpü manu barco, sürotüatai auna cauta nirrancarrti naqui esache manu barco. ⁵Sane ito nuñutu, chimiantai, pero chama urriante uirri, itopiqui uirri manitaca. Nusura tacana pese. Uiñonocota chimiatai, pero uirri omo nanaiña nüunrrü. ⁶Manrrü churriampü nuñutu pünanaqui nanaiña nocütüpü, itopiqui tarucapae nomünantü osoi aübuti osüborisapa uirri, arrtü manitaca churriampü. Tarucu nocüso uirri. Manitaca churriampü uiti choborese, y nanaiña nosüboriqui churriaiquipü uirri aübu bama osüborisapa. ⁷Uiapiaca mamansonoco aruqui nanaiña numuquianca, nutaumanca, noirroboca y nopiococa. Pero champüti naqui puerurrü amansone uiti nuturrti. ⁸Nuñutu chübatebopü ñanitacarrü nomünantü. Tacana noirborrü, tarucu nipene narurrü, oconca uirri. ⁹Ui nusura machapiencaca ümoti Tuparrü, y uipaurramacatito naqui osüborisapa, naqui nisamucurrtito Tuparrü isiu nacarrti! ¹⁰¿Causane manita urria y churriampü? Masaruquitaquí, tapü sane osoi. ¹¹Auqui taman pauraürrü chücuapütü turrü quicheseña ichepe turrü pichananene, tamantai nacarrtü. ¹²¿Acasopü puerurrü mata nüta olivo apüqui nihi higo? Chüpuerurrüpito mata nüta higo apüqui nihi uva. Isiatü pauraürrü chücuapütü turrü urria ichepe turrü pichananene.

¹³Arrti naqui onquisiöti ta mapanaunrrti au ñapensacarrti, tari ichimiancanatüyü, tari isamunenati ba omirria, nauqui atusi, ta

ñemanauncurratoe mapanaunrrti. ¹⁴Pero arrtütü autüboriquia aumeampatoe, y arrtütü pesabatai aume nenarrirrti quiatarrü, tapü amucanaño: “Arroñü bien mapanaunca”. Arraño apapancatai aumeampatoe, arrtütü amucanaño sane. ¹⁵Arrtütü sane napachüicoi, churriampü ümoti Tuparrü napapanauncu, ta icuqui nantai cürri, y ui bama machoboreca. ¹⁶Itopiqui arrtütü aurrianca nanaiña arrüna ane icu na cürri amenarribo, chauqui tapasamuca aruqui nanaiña nomünantü. Taburatoquiquiat. ¹⁷Pero arrtütü ane napapanauncu uiti Tuparrü, apisamute caüma arrüba omirria, chapahiquiapü, apacoconauncatai aumeampatoe, apapariquia nurria aübuti quiatarrü. Taquisürüma aume macirrtianuca. Apayuraca ümo bama ausüborisapa. Urrian tato nausüboriqui, chapapancaiquipü aumeampatoe. ¹⁸Arrtütü uirrimiacata tato notübori aübuti quiatarrü, auqui caüma urria nosüboriqui usaübumatoe.

Tapü urrianca ümo arrüna icuqui nantai cürri

4 ¹¿Tusio aume itopiquiche aburatoquiquiat aumeampatoe? Itopiqui ane nomünantü au nabausasü ui arrüna churriampü naurriantümo. ²Aurrianca ümo nenarrirrti quiatarrü, pero chüpuerurrüpü aye aboi. Itopiquiat tautüboriquia, tapahiquia, na aye aboi arrüna naurriantümo, hasta apatabaiquia. Pero chiyebopü aboi, itopiqui chapanquiquiapü pünanaquiti Tuparrü. ³Apanquiquia pünanaquiti, pero chütorriopü aume uiti, itopiqui churriampü napanquiqui. Aurrianca na ayurati Tuparrü aume ümo arrüna churriampü nausüboriqui.

⁴Arraño abaca tacana arrüba paüca abe isiu maquiataca mañoñunca. Itopiqui aurrianca manrrü ümo arrüna ane icu na cürri pünanaquiti Tuparrü. Arrtütü tarucu nurrianca ñome arrüba abe icu na cürri, champü nümocheti osoi Tuparrü, tacanarrtütü otüboriquiat ümoti. ⁵Canapae arraño chapaquioncañopü iyo nurarrrti Tuparrü, nauquiche nanti: “Icüpucati Espíritu Santo au nabausasü, na acuirati nurria autacu, tapü amecatü yesaquiñü”. ⁶Ñemanauncurratoe arrti Tuparrü bien buenurrrti usaübu, ocuasürüca ümoti. Sane nantü icu Nicororrrü:

Arrti chirranrrtipü ümo bama tarucu nivuanucurrüma, pero cuasürüma ümoti bama ichimiancanamacü isucarüti.

⁷Sane nauquiche apiñorroncosaño esati Tuparrü. Apipenesorrrti choborese aubesaqui. Auqui caüma besüburuti iche amopünanaqui. ⁸Amecosi saimia ümoti Tuparrü, arrti cuatati saimia aume. Apicoñoco nausüboriqui churriampü, tapü ane nomünantü aboi. Tari tamanacarrrtai napapensaca ümoti Tuparrü. ⁹Tari ausucheba. ¡Apiñorroncosaño! Tapü apiyabacañoinqui. Tapü aupucünuncaiqui itopiqui napipünate. ¹⁰Arrtütü apiñorroncosaño isucarüti Tuparrü, auqui caüma arrti bayurarati aume, yarusürürrü año uiti.

Tapü ünantü numanitaca apüti quiatarrü

¹¹Masaruquitaiqui, tapü apanitaca churriampü apüti quiatarrü. Arrti naqui manitanati churriampü apüti quiatarrü, manitanatito churriampü

ümo nüriacarrti Tuparrü. Arrtü arraña chapíñanauntapü nüriacarrti Tuparrü, chapicocotapito yacüpucurrti. ¹²Itopiqui tamantiatai Tuparrü naqui bacüpuru. Tonentito naqui bacurrtarati usaübu ñana. Yasuriuruti oñü o carrticabo oñü uiti. Tapü arrüciü, ¿causanempü asiquia anita churriampü apüti naqui aposapa?

Chütusiopü oemo nosüboriqui tubaca

¹³Amonsoi arraña, arrtü amucanaño sane: “Caüma o tubaca oecatü au pueblurrü ümo taman añorrü, na macompora y mapaventeca, nauqui ane chama nomoni”. ¹⁴Pero arraña tapü apapensaca sane, itopiqui chütusiopü aume isane pasabo tubaca. Chütusiopü aume, arrtü ausüboriquiaiqui tubaca. Nosüboriqui tacana mutusaürrtai; tusio baeta, auqui ensoro. ¹⁵Manrrü urria arrtü amucanaño sane: “Arrtü rranrrti Tuparrü osüboriquia tubaca, uisamune arrüna numapensatio”. ¹⁶Churriampü arrtü cusürübatái napanitaca aübu nauvanucu. ¹⁷Arrtü anati naqui tusio ümoti arrümanu urria uisamune, pero chisamutentipü, chauqui tane nipünatenti.

Macuansomocorrü ümo bama rricurrü

5 ¹Caüma suraboira ausucarü bama rricurrü: Abareo te, y autosibi, itopiqui cuatü aume nautakisürücü. ²Namenarri chauqui tirranrrü apore. Nurrarisüca chauqui tiñumate nabaibi. ³Naumoni chauqui tümameso ui naharrü. Itopiqui churrianquipü napisamute aübu naumoni. Naumoni ñana tacana pese aume. Ensoro nausüboriqui itopiqui. Arraña apaquiamaca chama monirri, abu tüsaimia ñapacümuncuturrti Tuparrü. ⁴Arraña chapapacacapiü ümo bama batrabacara au naubo. Arrüma aboma ñanquitioma amopünanaqui. Arrti Tuparrü chauqui toncoiti ñanquiquirrimia. Tonenti naqui ane nüriacarrti au nanaiña cürrü y au napese. ⁵Nausüboriqui auna icu na cürrü pururrü pierrtatai aboi. Chauqui tabaca tacana arrone nobiorrü baiüro, pero tüsaimia manu nanenese na aitabaiti Tuparrü manu nobiorrü. ⁶Apataquisünümacaca ümo bama urria nisüboriquirrimia. Aboma ito bama apitabaiquiama. Abu champü causane uimia aume. Chübahiyopüma.

Tapü ubata oemo nubarrüperaca cümenuti

Señor aübu noñanca

⁷Bueno bama masaruquitaqui, tapü ubata aume naparrüperaca cheperrti cuatati tato Señor. Tusio aume causane ui bama masamunuma ñanaunrrü. Barrüperarama cheperrtü cuatü tarrü. Barrüperarama ito na aye naurri niyorrüma. ⁸Sane ito arraña, tapü ubata aume naparrüperaca, tapü ausucheca, ta apiña nurria, itopiqui tüsaimia niyequirrti tato Señor. ⁹Tapü autüboriquia ümoti ausüborisapa, nauqui tapü ane napipüenate. Itopiqui arrti Tuparrü tüsaimia na ayeti acurrtati. ¹⁰Apaquionsaño ümo nurarrüma bama profetarri, arrübama manitanama tücañe uiti Tuparrü. Arrüma tücañe tarucapae nitaquisürücürüma, pero avantaboma. ¹¹Tusio aume urriampae nacarrüma caüma bama avantaboma

tücañe. Sane ito arroñü, urria nusaca ñana, arrtü masamuca tairrü ümo nutaquisürücü. Arraño amoncoi nürirrti Job tücañe. Tarucapae nitaquisürücürtri, pero chübatachebotipü uirri. Tusio ito aume isane pasabo ümoti au nitacürürri. Ta bayurarati Tuparrü ümoti. Sane ito oemo uiti Tuparrü. Pucürusuti utacu.

¹²Bueno bama masaruquitaquí, amonsapesio nurria arrüna nisura aume: Tapü apitusiancata curusürri arrtü ane aburapoboibo. Mejor aburasoitai isucarüti quiatarrü arrüna ñemanauntu, champü manrrü, nauqui tapü carrticabo año uiti Tuparrü.

¹³Arrtü anati naqui abarrüpecu tarucu nitaquisürücürtri, tari ñeanati ümoti Tuparrü. Arrti naqui pucünüñati, tari ñacantarati ümoti Tuparrü. ¹⁴Arrtü anati naqui maunroconoti, tari ñaemenati iyo bama mamayoreca eanaqui bama icocoromati Jesús. Tari ñeanama ümoti Tuparrü itacuti, tari isematama nasaite itati au nürirrti Tuparrü. ¹⁵Arrtü oncomatü nurria ümoti Tuparrü, urriancati tato maniqui maunrocono uiti. Arrtü ane nipünatenti, rrimiacana tato uiti Tuparrü. ¹⁶Sane nauquiche aburasaño isurarüti quiatarrü. Apapean ito ümoti Tuparrü itacuti quiatarrü, nauqui urrianaño tato auqui norrocorrü. Arrtü urria nosüboriqui aübuti Tuparrü, y arrtü manquiquia pünanaquiti aübu nanaiña nuyausasü, auqui caüma urriante oemo nanaiña ui nicüsürrti. ¹⁷Arrti profetarrü Elías tücañe anancati tacana nusaca. Tarucu ñanquiquirrti pünanaquiti Tuparrü, tapü paquio tarrü. Auqui chürrobeocapü ñome trerrü añoca y medio. ¹⁸Auqui manquioti tatito pünanaquiti Tuparrü na arrobo. Auqui rrobeoca tato. Ubaüro tatito arrüna utuburiboma. ¹⁹Masaruquitaquí, supiarrrtü anati naqui ññocotati ñacoconauncurrü ümoti Tuparrü. Auqui anati naqui quiatarrü manitanati nurria aübuti, nauqui asücübüti tato ümoti Tuparrü. ²⁰Apipiase nurria arrüna sane: Urriampae arrtü anati naqui bayurarati ümoti quiatarrü, nauqui ayeti tato esati Tuparrü. Uirri caüma urria nacarrti maniqui, chensoropü nausüpürtri, y morrimiacana tato nomünantü uiti.